

每週經課朗誦經文(巴克禮漢羅/教羅)2013/12/29

共同經課 - 1

以賽亞書六十三章七節~九節

7 我 beh 照耶和華一切所賞賜咱 ê, 講起耶和華 ê 慈愛 kap 耶和華 ê 名聲, kap 祂 òng 以色列家所施 ê 大恩, 就是照祂 ê 憐憫 kap 豐盛 ê 慈愛賞賜 in-ê。8 因為祂講, In 真正是我 ê 百姓, 無行虛假 ê kiáⁿ 兒; án-ni 祂 就做 in ê 救主。9 Tī in 一切 ê 苦難中祂也同受苦難, koh 祂面前 ê 使者拯救 in; 祂用慈愛 kap 憐憫救贖 in; tī 古早 ê 日常常抱 in, kûi in。

共同經課 - 2

詩篇一百四十八篇

1 Lín tiòh o-ló 耶和華。 Tùi 天頂 o-ló 耶和華; Tī 高 ê 所在 o-ló 伊。2 伊 ê 眾使者 ah, lín tiòh o-ló 伊。 伊 ê 眾天軍 ah, lín tiòh o-ló 伊。3 日 kap 月 ah, lín tiòh o-ló 伊; 發光 ê 星辰 ah, lín lóng tiòh o-ló 伊。4 天頂 ê 天, kap 天以上 ê 水 ah, lín lóng tiòh o-ló 伊。5 Chiah-ê lóng tiòh o-ló 耶和華 ê 名; 因為伊一下命令, 就 lóng 受創造。6 伊將 chiah-ê 建立, 到永永遠遠; 伊有定例, boē 會廢無。7 Tùi 地上 tiòh o-ló 耶和華, 就是大魚 kap 一切 ê 深淵; 8 火 kap 冰雹, 雪 kap 雲霧; Thàn 伊 ê 話 ê 狂風; 9 大山 kap 一切 ê 小山; 結果子 ê 樹, kap 一切 ê 柏香樹; 10 野獸 kap 一切 ê cheng-siⁿ; 蟲 thoā kap 飛鳥; 11 世上 ê 君王 kap 萬民; 貴族 kap 世上一切 ê 審判官; 12 少年人 kap 在室女; 老人 kap gín-ná; 13 Chiah-ê lóng tiòh o-ló 耶和華 ê 名; 因為只有伊 ê 名受尊做高; 伊 ê 榮光 poáⁿ 過天地。14 伊興起伊 ê 百姓 ê 角, Hō 伊聖 ê 百姓 lóng o-ló 伊, 就是以色列人, 親近主 hit-ê 百姓。 Lín tiòh o-ló 耶和華。

共同經課 - 3

希伯來書二章十節~十八節

10 因為萬物所為 tiòh 伊, 萬物所 tùi 伊 ê, teh chhoā choē-choē kiáⁿ 到 tī 榮光, 就 hō 救 in ê 首領 tùi 苦難來成完全, 本是合宜。11 因為 hit-ê hō 人成聖 ê, kap hiah-ê 得 tiòh 成聖 ê, lóng tùi 一個出; 所以伊稱 in 做兄弟無掠做見笑; 12 講, 我 beh 報揚你 ê 名 tī 我 ê 兄弟, O-ló 你 tī 會中。13 Koh 講, 我 beh oá 靠伊。Koh 講, 看 ah! 我 kap 上帝所 hō 我 ê kiáⁿ 兒。14 Taⁿ chiah-ê kiáⁿ 兒既然相同有血肉 ê 體, 伊本身亦平平有; beh 用死來廢無有死 ê 權勢 ê, 就是魔鬼; 15 亦 beh hō 一生驚畏死到親像做奴才 ê, lóng 得 tiòh tháu 放。16 因為伊無牽救天使, 是牽救亞伯拉罕 ê 後裔。17 所以凡事伊 tiòh kap 兄弟相同, thang tī 上帝 ê 事做憐憫忠信 ê 祭司頭, 因為百姓 ê 罪獻挽回 ê 祭。18 因為伊已經受苦來 tú-tiòh 試, 就會幫贊 chiah-ê 受試 ê 人。

共同經課 - 4

馬太福音二章十三節~二十三節

13 In 倒去了, 有主 ê 天使 tī 約瑟眠夢中出現講, 起來, chhoā 嬰 á kap 伊 ê 老母, 走去埃及, toà hia 到我 kā 你講; 因為希律 beh chhē 嬰 á 來滅伊。14 伊就起來, 透暝 chhoā 嬰 á kap 伊 ê 老母去埃及。; toà hia 到希律死; 15 是 beh 應驗主託先知所講 ê, 講, 我 bat 召我 ê kiáⁿ 出埃及。16 Hit 時希律知 hō 博士設去, 就大受氣, 差人將伯利恆 kap 周圍所有 ê ta-pō gín-ná, 照伊 tùi 博士詳細查 ê 時, 凡若二歲以下 ê 一盡 thài。17 Án-ni 應驗早託先知耶利米所講 ê, 講, 18 Tī Liáp-má 聽見聲, 啼哭 koh 大傷悲, Liáp-結哭伊 ê kiáⁿ 兒; M̄ 願受安慰, 因為 in 無--去。19 希律已經死, 主 ê 天使 tī 埃及, tī 約瑟眠夢中出現講, 20 起來, chhoā 嬰 á kap 伊 ê 老母去以色列地; 因為 hiah-ê ài 害嬰 á ê 性命 ê 已經死 lah。21 伊就起來, chhoā 嬰 á kap 伊 ê 老母到以色列地。22 總是聽見 A-ki-ló 續接伊 ê 老父希律 tī 猶太做王, 就 m̄ 敢去 hia; 既然 tī 眠夢中得 tiòh 指點, 就退去加利利 ê 境內。23 到一個城, 名拿撒勒, tiàm hia khiā 起; 是 beh 應驗早託 chiah-ê 先知所講 ê 講, 伊 beh 叫做拿撒勒人。